

**PEMBERITAHUAN PERTANYAAN
DEWAN RAKYAT, MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 20 SEPTEMBER 2021 (ISNIN)

SOALAN NO.50

Tuan Syed Ibrahim bin Syed Noh [Ledang] minta **MENTERI KOMUNIKASI DAN MULTIMEDIA** menyatakan data dan statistik jenayah seksual atas talian bagi tahun 2020 hingga 2021 serta langkah pihak berkuasa dalam inisiatif menangani serta memantau laporan buli siber kebelakangan ini.

JAWAPAN:

Tuan Yang di-Pertua,

Untuk makluman Ahli Yang Berhormat, daripada tahun 2020 sehingga 31 Julai 2021, pihak Suruhanjaya Komunikasi dan Multimedia Malaysia (MCMC) telah menerima **6,598** aduan awam secara umum berkaitan gangguan atau *harassment* (dengan izin) yang dilakukan secara dalam talian. Ini merangkumi tetapi tidak terhad kepada isu buli, gangguan seksual, ancaman, tindakan menakut-nakutkan serta penyalahgunaan maklumat, butiran atau gambar peribadi bagi tujuan penganiayaan atau mengaibkan individu tertentu.

Kesemua aduan yang diterima disusuli tindakan oleh pihak MCMC, termasuklah siasatan di bawah Seksyen 233 Akta Komunikasi dan Multimedia 1998 [Akta 588], yang melarang penyebaran kandungan sumbang, lucu, palsu, mengancam atau jelik, dengan niat untuk menyakitkan hati, menganiaya, mengugut atau mengganggu orang lain.

Berdasarkan semakan terhadap 6,598 aduan yang diterima, sejumlah **213** kes telah disiasat oleh pihak MCMC berhubung penyalahgunaan media sosial secara umum, dan **7** daripadanya telah dihadapkan ke mahkamah.

Selain itu, berdasarkan statistik laporan Cyber999 yang dikendalikan oleh CyberSecurity Malaysia (CSM), terdapat 219 aduan yang diterima berkaitan jenayah seksual dalam talian bagi tahun 2020 dan sebanyak 131 aduan sehingga Julai 2021. Kesemua aduan yang diterima tersebut telah dipanjangkan kepada agensi penguatkuasaan yang berkaitan untuk siasatan dan tindakan undang-undang.

Bagi membendung gangguan dan jenayah siber, Program Pemerksaan Keselamatan Siber atau SiberKASA telah dilancarkan pada 23 Mac 2021 bertujuan untuk membangun, memperkasa, melestari dan mengukuhkan prasarana serta ekosistem keselamatan

SOALAN NO: 50

siber Malaysia agar sentiasa mampan, terpelihara, dan berdaya tahan. Inisiatif ini dibangunkan berdasarkan pendekatan keselamatan siber secara holistik yang merangkumi 3 komponen iaitu Insan (*People*), Proses (*Process*) dan Teknologi (*Technology*). Sehingga kini, sebanyak 39 program Cyber Security Awareness Talk telah dilaksanakan melibatkan 21,491 orang golongan sasar yang terdiri daripada masyarakat umum seperti penjawat awam, pelajar universiti dan kolej serta pekerja swasta

Selain itu, pihak Kementerian juga sedang menjalankan kajian berkaitan keperluan pewujudan undang-undang antibuli siber yang khusus di Malaysia. Kajian ini akan melihat contoh perundangan yang dilaksanakan oleh negara-negara lain seperti Australia dan juga New Zealand. Penyediaan draf perundangan tersebut dijangka dapat disempurnakan pada akhir tahun ini.